



# Synfocity = 515

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

27<sup>th</sup> November, 2014

- **Intensive Residential Pastoral Care & Counselling Training vawi 24-na khar**  
 Family Guidance & Counselling Centre (FG&CC)-in Pastor te puala, Intensive Residential Pastoral Care & Counselling Training vawi 24-na, November 12, 2014 atanga a buatsaih chu November 25, 2014 zan khan khar a ni. He training-ah hian Pastor 17 an tel a, Synod Moderator Rev. K. Lalhmuchhuaka chuan training chhuakte hnenah certificate a hlan. Counselling Training kharna inkhawm hi FG&CC Director, Rev. R.Lalhmingshanga'n kaihruiin FG&CC rawngbawlna report a pe nghal a. Trainee te chuan an hlawkpui dan lem ziaka an entir chu an hrilhfiah a, Chaltlang Pastor Bial Zaipawl ten zaia rawngbawlna neiin Trainee aiawhin Rev. K. Zalawma'n thu a sawi bawk. Training kharna inkhawm hmanpuitu Synod Moderator chuan thuchah sawiin, Kohhranhote rawngbawlsak thei tur leh harsatna hrang hrang neite tanpui thei tura Counselling Training buatsaih a ni chu lawmawm a tih thu a sawi a. "Midangte rawngbawlsak tura thil pawimawh te chu hmangaihna te, taihmakna te leh tuarchhelna te hi a ni," tiin, rawngbawltute chu midangte tana malsawmna ni zel turin a fuih bawk.  
 FG&CC Director report-a a lan danin FG&CC hian kum tinin Counselling Training hi Kohhran hruaitute pualin vawi 2 leh Pastor te pualin vawi 1 a buatsaih thin a. Kohhran hruaitu mi 401 leh Pastor 407 training an neihpui tawh a ni. Tunah hian Synod hian Counselling Centre pali - Mission Veng, Chanmari, Vaivakawn leh Champhaiah an nei mek a, kum 2015 ah hian Serchhip leh Kolasib-ah Family Guidance & Counselling Centre thar hawn tum a ni bawk.
- **Kohhran Hmeichhe Ni**  
 November 28, 2014 (*Zirtawpni*) hi **Kohhran Hmeichhe Ni** a ni a, Presbyterian Kohhran Hmeichhiate chuan hemi pual hian *programme* an hmang ang. Kohhran Hmeichhe Ni hi *kum 1997* atangin hman *tan* a ni a, kumin hi *vawi 18* an hmanna tur a ni.  
 Kohhran Hmeichhe Inkhawmpui Lian-in Kohhran Hmeichhe Ni bik neih hi a rel a, *Synod Executive Committee (SEC)* in *November Zirtawpni hnuhnung ber* hi *Kohhran Hmeichhe Ni* atan hman ni se tia a relsak angin *kum 1997* atang khan hman thin a ni. *Synod Calendar*-ah pawh Synod Ni pawimawh zinga dah tel a ni bawk. Central Kohhran Hmeichhe Committee chuan hemi pual hian *programme* a duang a, Dr. Ruth Lalmuanpuii, Psychiatrist, Civil Hospital, Aizawl ziah '**Nute mamawh - Rilru hrise!**' tih thupui zirho a ni ang. Chawhma Inkhawmah Thupui zirho a ni ang a, chawhnuah Bial/Kohhranin tha an tih angin *programme* an hmang ang.
- **Kohler Hruaina Eng Quiz Final hun a thleng dawn ta**  
 October 14, 2014 zan atanga Synod Information & Publicity (Synfo) buatsaih Kohler Power Systems Hruaina Eng Quiz chu naktuk (Nov. 28, 2014) zan dar 7:30 hian Top 3 ten Final Round inelna an nei dawn a, result puan leh lawmman semna neiin kharna hun hman nghal a ni ang.  
 November 20 & 21, 2014 khan Top 10 ten inelna an nei leh a, chung zing atang chuan Durtlang Branch, ITI Vengchhak Branch leh Zarkawt Branch ten Final Round hi an lut a ni.  
 Final Round-ah hian Luka, Kohhran Chanchin, KTP, G.K, Audio & Visual Round leh in lam (Home Branch) atanga member te lo chhan ve tur zawhna pahnih Luka Bu atangin zawh leh a ni ang.  
 Kohler Hruaina Eng Quiz hi Aizawl khawpui Presbytery huam chunganga Branch KTP te tan a buatsaih a ni a, Branch 82 an tel a ni. Quiz tiha lawmmanah hian pakhatnain Rs. 1,00,000/-, pahnihnain Rs.70,000/- leh pathumnain Rs. 50,000/- an dawng ang.  
 He quiz sponsor-tute chu Kohler Power Systems, Lower Zarkawt (Main Sponsor); E.R. Enterprises, Ramhlun South; Highland Chevrolet, Zemabawk; Computer House & Photo House, Millennium Centre; Electrical Inspectorate, P & E Department, Zuangtui; Zoland Electronics, Chanmari leh Dyna Roof, Guwahati te an ni.  
 Kohler Power Systems Hruaina Eng Quiz hi show neih apiangin Hruaina Eng Channel (LPS & Zonet Cable TV)-ahLive in pekchhuah thin a ni.
- **Central KTP buatsaih PRAISE '14 ruahmanna puangzar**  
 November 25, 2014 khan Synod Office Utility Room-ah Central Kristian Thalai Pawl chuan Praise '14 hman dan tur ruahmanna tlangpui a puangzar.  
 KTP General Conference thurel "Thalai zawkte hip khawm thei programme siam ni rawh se" tih bawhzui nan Central KTP chuan Ni 5 Dec 2014 6:00 PM hian Pathian fak leh chawimawina hunpui PRAISE 14 Rajiv Gandhi Stadium, Mualpuiah a buatsaih dawn a ni. He hunah hian fakna hla ngaihthlak tur te, lemchan leh lam en tur te a awm dawn bakah Krismas thuchah Central KTP Leader Rev. J. Lalremsiama hnen atangin ngaihthlak a ni ang. Heng bakah hian Pathian fak leh chawimawina hun a tam thei ang hman a ni ang. Tin thlalai Pathian thu a tuihal kawm turin Councelling cell siam a ni a, Councillor 40 duty tura beisei a ni. Hetiang thlalai nun siamtha duh kawmte hi Central KTP chuan a tul ang a bawhzui zel turin ruahmanna a siam a ni. He programme ah hian thalaite kal tura beisei an nih rualin nu leh pa naupang thlengin tel theih a ni.  
 A hmanna tur hmun chung chang ah hian khawpui chhung hmun hrang hrang ngaihtuah hmasak a ni a, programme lian tham siam hian khawpui chhung nunphung, lirthei che vel leh parking thleng a harsatna a thlen theih avangin tuna hmanna tur hmun hi thlan a ni ta a ni. Programme hmanna tur hmun hi kan ram tan ro hlu tak a ni tih hriaiin Central KTP chuan he programme a kal tur zawng zawng te pawh uluk tak leh a hmun hma fai taka vawng turin a beisei a. Central KTP Committee chuan a hmun hma te tha taka vawn a nih theih nan KTP Branch hrang hrang atangin duty tur mi 700 vel a ruat a ni.  
 Hemi zan programme a kal tur te kal dan turah a felfai zawk theih nan Aizawl Traffic SP hovin hetiang hian ruahmanna siam a ni.

  - a. Chanmari atanga hmar lam zawng ten Falkland atangin world bank kawngah kalin Mualpui pan tur.
  - b. Zarkawt leh Sikulpuikawn inkar te tan Treasury leh Upper Republic atanga kal tur a ni.
  - c. Mission Veng atanga chhimlam tan- LMV leh two wheler te chu Venghnuai-Salem road atanga kal tur a ni a. Branch Bus a kal te chu Treasury/Upper Republic atanga kal tur.
  - d. Salem-Venghnuai road hi tlai dar 4:30 atang chuan chho zawnga kal phal a ni lo ang.
  - e. Saikhamakawn chhim lam zawng chu World Bank Road (Zampuimanga Lungphun) atanga kal tur a ni.
  - f. Bus hmang tur Branch-te chuan mahni bus hmaah langsar takin Branch hming tarlan ni thei se.

Contd...

- **Apologetic seminar nei**  
 Mizoram Presbyterian Church Synod hnuai Campus Ministry huaihawtin November 26 - 28, 2014 chungna neih tur Residential Apologetic Seminar chu Synod Conference Centre-ah tan a ni.  
 He seminar hi rinna humhimna seminar a ni ber a, tunlai khawvela hriatna leh thiamna lo sang zelah mithiam thenkhat Pathian hnialtu lo chhuak mekte ngaihdan leh sakhua ep zawnga pawm dan lo piang mek chungchang zir chianna leh rinna dinhmun humhalhna tur a ni ber.  
 He seminar-ah hian mithiam hrang hrangte paper buatsaih zir ho a ni a, Pathian awm rin lohna leh a chhan chhui chianna te, philosophy atanga Pathian thlirna leh science lam atanga Pathian awmze zir chhuahna te a ni hlawn a. Kristiante thurin, Apostol-te pawm dan Bible leh khawvel thil thlang behchhana a dikna finfiahna tur leh chu lama ringtute dinhmun sawh nghehna tura hmalakna pawimawh tak a ni.  
 He seminar-ah hian mithiam sawm bik mi pariat thuziak zir ho a ni a. Paper buatsaitute chu Rev. Zoramsanga, Dr. Zaithanzauva, Rev. Dr. Ramengliana, Rev. Rosiamliana Tochwang, Dr. Laldinliana Varte, Rev. Dr. H. Vanlalauva, Rev. P.C. Lalropuia, Upa Dr. Vanlalzara te an ni. He programme hawnna inkhawm hi nizan (Nov. 26, 2014) dar 6:00 khan neih niin Rev. Lalzuithanga, Senior Executive Secretary, Mizoram Synod-in a kaihrui a ni.
- **Grace Home kum 10 tlin lawmna**  
 Nimin (Nov. 26, 2014) chawhnu dar 2:00 khan Synod Hospital hnuai Grace Home (HIV/AIDS Hospice) rawngbawlna kum 10 tlin lawmna leh Pathian hnena lawmthu sawina, Synod Hospital, Durtlangah neih a ni.  
 Programme hi Dr. Vanlalruata, Synod Hospital Director-in a kaihrui a, Rev. R. Ramdinmawia, Synod Hospital Sr. Chaplain-in hunserh a hmang a, Dr. R.L. Sanghluna, Sr. Medical Officer i/c Grace Home in Report a pe a, Synod Moderator Rev. K. Lalhmuchhuakan Thuchah sawiin tawngtaina hun a hmang. Damlo te hnen atang leh a duh apiang tan thusawina hun hawn a ni a, Upa F. Lalsangliana, Synod Hospital Coordinator-in Lawmthu sawina hun a hmang a, Rev. Lalramliana Pachuau, Executive Secretary i/c Hospital in malsawmnain programme a khar a ni.
- **Zin**
- ◆ November 26 - 29, 2014 hian Khawbung Venglai Kohhran Silver Jubilee lawmna hmanpui turin Rev. Dr. R. Lalbiakmawia, Finance Officer a kal.
  - ◆ November 29 - 1 December, 2014 hian Phuabuang Pastor Quarters thar hawng turin Rev. Lalzuithanga, Senior Executive Secretary a kal ang.
- **Synod Mission Board**
- ◆ November 20 - 23, 2014 khan Chhimbial Chakma Convention vawi 10-na, Tuichawngah neih a ni a, Speaker atan Dona Kumar an hmang a, ring lo mi 62 laiin baptisma an chang thar.
  - ◆ Synod Mission Board-in kum 2015 chung missionary (*Evangelist, Evangelist Teacher, Staff Nurse, Health Worker, Craft Teacher, Office Assistant*) tur mi 119 a lak tharte pualin November 10 - 28, 2014 chung hian Orientation Training, Mission Veng Kohhran Hall-ah neih mek a ni a, vawiin (Nov. 27, 2014) khan post ruak dang pahnih hnawhkhat turin Waiting List atangin Lalduhzuali D/o Kapthuama, Sialhau leh Johan Chhingthanmawia S/o Vunghnuna, Kanan te lak thar leh an ni.
  - ◆ November 23, 2014 khan Patna Mission Field-ah mi 8 in Baptisma an chang thar. Kararya Fellowship, Gopalganj, Patna North Pastor Bialah mi 7 in Bialtu Pastor Zairemtluanga kutah Baptisma an chang a. Fetehpur Fellowship, Patna South Pastor Bialah mi 1 in Bialtu Pastor C. Lalremzuala kutah Baptisma a chang bawk.
  - ◆ Synod Mission Board chuan November 12, 2014 khan Missionary chawmna atan Mizo Presbyterian Church of USA atangin Rs. 1,76,290/- a dawng, SMB-in Pathian leh Mizo Presbyterian Church of USA hnenah lawmthu an sawi a ni.
  - ◆ Home Mission South-a Home Mission Sikul, Hmawngbu chuan November 25 - 26, 2014 khân Silver Jubilee an lawm a. November 25, 2014 khan Rev. Lalchhuanmawia, Secy. (SMB) chuan Silver Jubili Lungphun a hawng a, hun hlimawm taka hman zui nghal a ni. Jubili hmanga kal pah hian Mission hmalakna hmun dang tlawhin an fang kual nghal a, Rev. Lalchhuanmawia hi Pu H. Vanlalchhuanga, School Supervisor of Schools (SMB)-in a tawiam a ni.
- **Music**  
 November 25 - 28, 2014 hian W. Bunghmun Kohhranah Music Training neih mek a ni a, hemi neihpui hian Pu Lalromawia, Senior Music Instructor leh Upa Thanghuta, Dam Veng te an kal.
- **Hruaina Eng FM Radio & TV Programme**
- ◆ **NOVEMBER 28 (FM Zoawi Aizawl @ 7:30 p.m.)**  
**Solo** : Chris M.S Dawngkima - Kawng min hawn r'u, **Zaipawl** : Muallungthu Bial Zaipawl - A nghak reng che, **Thusawi** : Upa V.L Zahawma - Hna, **Solo** : Stacy V.L Muanpuii - Tunge, **Zaipawl** : Chanmari Pastor Bial Zaipawl - Kan Chatuan Pa lenna run ah, **Solo** : Lalduhsaki - Aw Hmangaihna sawithiam ila
  - ◆ **NOVEMBER 28 (FM Lunglei @ 7:30 p.m.)**  
**Solo** : Chris M.S Dawngkima - Kawng min hawn r'u, **Zaipawl** : Muallungthu Bial Zaipawl - A nghak reng che, **Thusawi** : Upa V.L Zahawma - Hna, **Solo** : Stacy V.L Muanpuii - Tunge, **Zaipawl** : Chanmari Pastor Bial Zaipawl - Kan Chatuan Pa lenna run ah, **Solo** : Lalduhsaki - Aw Hmangaihna sawithiam ila
  - ◆ **NOVEMBER 30 (TV Programme @ 3:00 p.m.)**  
**Naupang Pual** : Pathianni Naupang Inkhawm, Ramthar North Kohhran, **Playback** : FGCC 24th Intensive Training Khama
- **Susamachar Prasaran Programme**  
**NOVEMBER 30 (Pathianni) 5:00 pm. Hindi Gospel Programme (Susamachar Prasaran)** :  
**Group/Choir/Solo** : Karbi Presbytery Choir - Ne vang thu lo, **Group/Choir/Solo** : Champhai Vengthlang Pastor Bial - Hamara Kal, **Sermon** : Rev. S.B. Gurung - Samai Ka Sudh Upyog, **Group/Choir/Solo** : Zemabawk Bial Masihi Sangati - Jiboner Last, **Group/Choir/Solo** : Khatla Masihi Sangati - Ishu Tera Wada
- **Moderator Programme**  
 Synod Moderator Rev. K. Lalhmuchhuaka chuan hetiang hian hun a hmang ang :  
 November 29, 2014 (Inrinni) : Serchhip Kawnpui Biak In a hawng ang  
 November 30, 2014 (Pathianni) Chawhma : Hriangtlang Kohhran  
 November 30, 2014 (Pathianni) Chawhnu : Serchhip Hmar Veng Kohhran  
 November 30, 2014 (Pathianni) Zan : Serchhip Bethel Kohhran